

**Eqqumiitsuliornermik ingerlatsineq pillugu Inatsisartut inatsisaata
allanngortinnissaannut Inatsisartut inatsisissaattut siunnersuut nr. xx, xx. xxx 2019-
imeersoq**

(Eqqumiitsuliornermik ingerlatsineq tamassuminngalu siammarterineranut
aningsaateqarfimmik tapiissutinik aqutsisussamik pilersitsinissamut inatsisitigut
tunnngavissat)

(Ilinniartitaaneranut, Kultureqarnermut, Ilageeqarnermut Nunanullu Allanut Naalakkersuisoq)

Akissuteqaat

(Ilinniartitaaneranut, Kultureqarnermut, Ilageeqarnermut Nunanullu Allanut Naalakkersuisoq)

Aappassaaneerpeqarnera

Naalakkersuisut Kultureqarnermut, Ilinniartitaaneranut, Ilisimatusarnermut Ilageeqarnermullu
Ataatsimiititaliap sulillaarsimaneranut isumaliutissiisuteqarneranullu qujapput.

Naalakkersuisut iluarisimaarlugu maluginiarpaat ataatsimiititaliap siunnersuut ilaleraat.

Ataatsimiititaliap isumaliutissiisummini maluginiarpaat, siunnersuutip siullermeerpeqarnerani
ukiumut ukiunulluunniit arlalinnut legatimik tunineqarnissamut periarfissat pillugit
apeqquteqartoqarsimasoq, tamannalu ataatsimiititaliap paasinninnera malillugu aqqissuussat
Statens Kunstfond aqqutigalugu inuuneq naallugu ataqqinninniarluni tunniunneqartartunut
innersuussipput. Ataatsimiititaliap isumaliutissiisummini Naalakkersuisunut nalileqquaa,
tunniussaq taamaattoq Nunatta Karsiata ukiuni arlalinni pisussaaffissaa qanoq inatsisitigut
tunnngavissamik piumasaqarfussanersoq. Ataatsimiititaliap tamanna nangillugu oqaatigaa,
tapiissutinut taamaattunut Nunatta Karsianik ukiuni arlalinni pisussaaffiliisussanut
ersarissumik tunnngavilerneqarnissaa qulakkeertariaqartoq. Taamaaliortariaqarporlu ukiuni
aralinnut atugassanik aningaasanik taamaattunik tunniussaqartarnermut piumasaqaatissat
tunnngavissallu pillugit malittarisassanik aalajangersaasoqarnissaa periarfissinniarlugu - soorlu
nalunaarutitigut.

Naalakkersuisut aamma nalilersugassaraat tapiissuteqartoqarsinnaaneranut tunnngavissamik
ersarissumik pilersitsisoqartariaqarnerasoq, ukiup aningaasanut inatsimmi aningaasaliissutit
saniatigut atuuttussamik, tassalu matumani ukiuni arlalinni aalajangersagaannngitsuni.

Tassungalu atatillugu oqaatigineqassaaq, siunnersuummut matumani pineqartumut atatillugu
tunnngavissamik taamaattumik atuisoqalernissaa periarfissaanngitsutut nalilerneqarmat.
Taamaattumik taamatut inatsisissamik suliaqarneq inatsisissatut siunnersuummik
suliaqarnermut nalinginnaasumik periuserineqartoq atorlugu ineriartortariaqarpoq, soorlu
peqataasut attuumassutillit isumasiorlugit, tusarniaatitsinerit ingerlallugit Inatsisartunullu
saqqummiussilluni.

Taamaammat Naalackersuisut eqqumiitsuliornermik ingerlatallit peqatigiiffii peqatigalugit inuuneq naallugu pisartagassanik kissaateqarneq aamma taamatut kissaateqarnerup piviusunnigortissinnaanissaanut periarfissat pillugit oqallittoqarnissaanik pilersaaruteqarput. Tassungalu atatillugu piumasaaqatit qanoq ittut taamatut tunniussisoqarniarnermi aalajangiisuussanersut, tunniunneqartartut amerlassusissaat, tunniunneqartut annertussusissaat, pisariaqassappat isertitanut naleqqussaasoqarnissaa aamma eqqumiitsulioriaatsinut ataasiakkaanut qanoq agguasoqartarnissaa erseqqissumik paasiniartariaqassapput, matumanilu aamma eqqumiitsuliornermi toqussartik tikillugu taamatut tunineqartartut aapparisaannut qimagaasunut aningaasanik kingusinnerusukku tunniussisoqartassanersoq paasiniaaffigalugu. Tamatuma saniatigut qulakkeertariaqarpoq taamatut tunniussisarnermut aningaasat pisariaqartinneqartut piginissaat, tassami uani malugisariaqarpoq tamanna aallaaviatigut killiliussat iluanni aningaasalersortariaqassammat, tamatumalu kingunerissallugu eqqumiitsuliornermi suliaqarnermut, sulinissamut legatinik allanillu agguaanissamut aningaasat ikinnerusut atortariaqalernissaat. Aamma eqqumiitsuliornermik ingerlatallit pillugit inatsisip kisimiitillugu iluarsiiiffiginissaa tulluurtuussanersoq, imaluunniit tamanna pillugu nalunaarutiliorluni malittarisassanik erseqqinnerusunik aalajangersaasoqassanersoq isummerfigineqartussaassaaq, ataatsimiititaliap ilanngullugu periarfissatut tikkuussinerattuut.

Ilanngullugu taaneqassaaq massakku kulturikkut suliaqarnissamut legatinik tunniussisoqartarmat, tamakkulu eqqumiitsuliornermi inuuniutigalugu, ingerlatsillutik pilersitsillutillu ingerlatalinnut Nunatsinni aalajangersimasumik najugalinnut tunniunneqartarput. Legatit ukiumut ataasiartumik qaammammullu 22.000 kr.-inngorlugit tunniunneqartarsinnaassapput, taamaalilluni tiguisusaaq qaammammut aningaasarsiaqartinneqarsinnaassalluni.

Naalackersuisut taamatut oqaaseqarlutik siunnersuut taamatut isikkoqarluni pingajussaaneerseqarnissaanut ingerlateqqinneqassasoq inassutigaaq.